

VII bo‘lim. Deklarant, bojxona brokeri va bojxona rasmiylashtiruvi bo‘yicha mutaxassis

39-bob. Deklarant

274-modda. Deklarantga qo‘yiladigan talablar

Quyidagilar deklarant bo‘lishi mumkin:

1) O‘zbekiston Respublikasining yuridik va jismoniy shaxsi;

2) chet ellik shaxs:

tovarlarni notijorat maqsadlarda olib o‘tuvchi jismoniy shaxs;

ushbu Kodeksning X bo‘limiga muvofiq bojxona imtiyozlaridan foydalanuvchi shaxs;

Norezidentning qonun hujjatlariga muvofiq tashkil etilgan O‘zbekiston Respublikasidagi doimiy muassasasi;

O‘zbekiston Respublikasi hududida belgilangan tartibda akkreditatsiya qilingan vakolatxonaga ega bo‘lgan shaxs shunday vakolatxonalarning o‘z ehtiyojlari uchun olib kiriladigan tovarlarni vaqtincha olib kirish, reeksport qilish, bojxona tranziti bojxona rejimlariga, shuningdek erkin muomalaga chiqarish (import) bojxona rejimiga joylashtirishni ma’lum qilganda;

tashuvchi tovarlar bojxona nazorati ostida tashilayotganda.

275-modda. Deklarantning huquqlari

Tovarlarni deklaratsiyalashda deklarant quyidagi huquqlarga ega:

bojxona deklaratsiyasi va bojxona maqsadlari uchun zarur boshqa hujjatlar berilguniga qadar tovarlarni bojxona nazorati ostida koʻzdan kechirish hamda oʻlchash, ularning namunalari va nusxalarini olish;

tovarlarning va (yoki) transport vositalarining bojxona rasmiylashtiruvini oʻtkazishda, bojxona organining mansabdor shaxslari tomonidan namunalar va nusxalar olinayotganda tovarlarning tekshirilishida hozir boʻlish;

bojxona organlarining mansabdor shaxslari tomonidan olingan namunalar va nusxalarni tekshiruvdan oʻtkazish natijalari bilan tanishish;

bojxona rasmiylashtiruvi boʻyicha operatsiyalarni bajarish uchun bojxona nazorati zonasiga kirish;

bojxona masalalari boʻyicha bojxona organlaridan axborot va maslahatlar olish;

tovarlarni va (yoki) transport vositalarini bojxona hududidan olib chiqish niyati toʻgʻrisida bojxona organlarini xabardor qilish;

dastlabki operatsiyalar amalga oshirilayotganda bojxona maqsadlari uchun zarur boʻladigan hujjatlarning loyihalarini tayyorlash;

deklaratsiyalanadigan tovarlarni va (yoki) transport vositalarini bojxona omborlariga bojxona nazorati ostida joylashtirish;

(275-moddaning birinchi qismi Oʻzbekiston Respublikasining 2018-yil 3-oktabrdagi OʻRQ-494-sonli Qonuniga asosan beshinchi — toʻqqizinchi xatboshilar bilan toʻldirilgan — Qonun hujjatlari maʼlumotlari milliy bazasi, 04.10.2018-y., 03/18/494/1992-son)

tovarlarni elektron shaklda deklaratsiyalash uchun zarur hujjatlar va ma'lumotlarni taqdim etish uchun mo'ljallangan bojxona organlarining axborot tizimlaridan foydalanish.

Tovarning bojxona qiymatini aniqlashda deklarant quyidagi huquqlarga ega:

bojxona organiga taqdim etilgan, tovarning bojxona qiymatini aniqlashda foydalanilgan ma'lumotlarning ishonchliligini isbotlash;

tovarning ma'lum qilingan bojxona qiymatiga aniqlik kiritish zarurati tug'ilganda, basharti tovarning bojxona organi tomonidan aniqlangan bojxona qiymatiga muvofiq bojxona to'lovlari to'lanishini ta'minlasa yoxud bojxona to'lovlarini to'lasa, deklaratsiyalangan tovardan bojxona organining ruxsati bilan foydalanish;

tovarning bojxona qiymatini aniqlash xususida bojxona organining qarori, uning mansabdor shaxslari harakatlari (harakatsizligi) ustidan qonun hujjatlarida belgilangan tartibda shikoyat qilish.

Deklarant qonun hujjatlariga muvofiq boshqa huquqlarga ham ega bo'lishi mumkin.

276-modda. Deklarantning majburiyatlari

Deklarant:

tovarlarni va (yoki) transport vositalarini deklaratsiyalashni amalga oshirishi;

bojxona maqsadlari uchun zarur, shu jumladan deklaratsiyalanayotgan tovarlarga va (yoki) transport vositalariga nisbatan vakolatli organlar tomonidan o'tkaziladigan veterinariya, fitosanitariya nazorati, ekologik nazorat va davlat nazoratining boshqa turlari talablariga rioya etilishi to'g'risidagi

hujjatlarni va (yoki) ma'lumotlarni bojxona organiga taqdim etishi;

bojxona chegarasi orqali olib o'tilayotgan tovarlarni va (yoki) transport vositalarini bojxona organining talabiga ko'ra taqdim etishi;

bojxona organining talabiga ko'ra tovarlarni tarozida tortishni hamda boshqacha tarzda ularning miqdori va sifatini aniqlashni, shuningdek deklaratsiyalanayotgan tovarlarga va (yoki) transport vositalariga nisbatan yuk operatsiyalarini amalga oshirishi;

bojxona to'lovlarini to'g'ri hisoblab chiqarishi;

ushbu Kodeksning [47-bobiga](#) muvofiq bojxona to'lovlarini to'lashi yoki ularning to'lanishini ta'minlashni taqdim etishi;

tovarlarning va (yoki) transport vositalarining bojxona rasmiylashtiruvda bojxona organining talabiga ko'ra hozir bo'lishi hamda bojxona organining mansabdor shaxslariga bojxona rasmiylashtiruvini o'tkazishda ko'maklashishi;

tovarlar va (yoki) transport vositalari joylashtirilgan bojxona rejimi talablari hamda shartlariga rioya etishi;

tovarlarni va (yoki) transport vositalarini deklaratsiyalashda bojxona identifikatsiyalash vositalari o'zgartirilganligi, yo'q qilinganligi, buzilganligi yoki yo'qotilganligi, idishlar va o'rovlar buzilganligi, tovarlar tovarning kuzatuv hujjatlarida va bojxona nazoratining boshqa hujjatlarida ko'rsatilgan ma'lumotlarga muvofiq emasligi aniqlanganligi haqida bojxona organlarini o'z vaqtida xabardor qilishi shart.

Tovarning bojxona qiymatini aniqlashda deklarant:

bojxona organiga tovarning bojxona qiymatini ma'lum qilishi;

tovarning bojxona qiymatini aniqlashga taalluqli ma'lumotlarni bojxona organining talabiga ko'ra taqdim etishi shart.

Deklarantda tovarning o'zi ma'lum qilgan bojxona qiymatini aniqlashtirish yoki bojxona organiga qo'shimcha ma'lumot taqdim etish tufayli yuzaga kelgan xarajatlar deklarantning zimmasida bo'ladi. Tovarning bojxona rasmiylashtiruvi muddatining bojxona qiymatini aniqlash bilan bog'liq tarzda uzaytirilishidan deklarant bojxona to'lovlarini amalda kechiktirib to'lash uchun foydalanishi mumkin emas.

Deklarantning zimmasida qonun hujjatlariga muvofiq boshqa majburiyatlar ham bo'lishi mumkin.